

四庫全書

集部

欽定四庫全書

御訂全金詩增補中州集卷六十三

遺獻二人

元好問一

共詩一千三百五十六首以下已
借刻顧嗣立元百家詩初選中

補元郝經元遺山先生墓銘歲丁巳秋九月四

日遺山先生卒於獲鹿寓舍經走常山三百里

爇文酹酒哭於畫像之前先生與家君同受業

於先大父經復逮事先生者有年義當叙而銘

之詩自三百篇以來極於李杜其後纖靡淫豔
怪誕僻澀寢以弛弱遂失其正二百餘年而至
蘇黃振起衰路益為瓌奇復於李杜氏金源有
國士務決科干祿置詩文不為其或為之則羣
聚訕笑大以為異委墜廢絕百有餘年而先生
出焉當德陵之末獨以詩鳴上薄風雅中規李
杜粹然出於正直配蘇黃氏天才清贍邃婉高
古沉鬱太和力出意外巧縉而不見斧鑿新麗

而絕去浮靡造微而神采燦發雜弄金碧揉飾
丹素竒芬異秀洞蕩心魄看花把酒歌謠跌宕
挾并幽之氣高視一世以五言雅為正出奇於
長句雜言至千五百餘篇為古樂府不用古題
特出新意以寫怨思者有百餘篇用今題為樂
府揄揚新聲者又數十百篇皆近古所未見也
汴梁亡故老皆盡先生遂為一代宗匠以文章
獨步幾三十年銘天下功德者盡趨其門有例

有法有宗有趣又至百餘首為杜詩學東坡詩
雅錦機詩文自警等集指授學者方吾道壞爛
文曜瞠昧先生獨能振而鼓之揭光於天俾學
者歸仰識詩文之正而傳其命脈繫而不絕其
有功於世又大也每以著作自任以金源氏有
天下典章法度幾及漢唐國亡史興已所當為
而國史實錄在順天道萬戶張公府乃言於張
公使之聞奏願為撰述奏可方闢館為武安樂

夔所沮而止先生曰不可遂令一代之美泯而
無聞乃為中州集百餘卷又為金源君臣言行
錄往來四方采摭遺逸有所得輒以寸紙細字
親為記錄雖甚醉不忘於是雜錄近世事至百
餘萬言捆束委積塞屋數楹名之曰野史亭書
未就而卒嗚呼先生可謂忠矣先生諱好問字
裕之太原秀容人系出拓跋魏故姓元氏曾大
父春忠顯校尉隰州團練使大父滋善儒林郎

銅山府君贈朝列大夫父格顯武將軍鳳翔府
路第九處正將兼行隴城縣令騎都尉河南縣
開國男邑食三百戶妣河南縣君張氏先生七
歲能詩太原王湯臣稱為神童年十一從其叔
父官於冀州學士路宣叔賞其俊爽教之為文
年十有四其叔父為陵川令遂從先大父學先
大父即與倡和或者譏其不事舉業先大父言
吾政不欲渠為舉子爾區區一第不足道也遂

令肆意經傳貫串百家六年而業成下太行渡
大河為箕山琴臺等詩趙禮部見之以為少陵
以來無此作也以書招之於是名震京師目為
元才子登興定五年進士第不就選往來箕潁
間數年而大放厥辭於是家按其什人嚼其句
洋溢於里巷吟諷於道塗巍然坡谷復出也初
筮仕除鎮平令再轉內鄉遂丁艱憂終喪正大
中辟中州南陽令南陽大縣兵民十餘萬帥府

令兼鎮撫甚有威惠詔為尚書都省掾居無何
除左司都事再轉為中順大夫行尚書省左司
員外郎兼修起居注上騎都尉河南縣開國子
食邑五百戶賜金紫魚袋天興初入翰林知制
誥金亡不仕而卒春秋六十有八某年月日葬
於秀容之先塋前配同郡張氏戶部尚書林卿
之女再配臨清毛氏推貨司提舉飛卿之女子
男三人長曰撫奉直大夫汝州知州兼管諸軍

鄂勒勸農事次曰振仕太原路參佐次曰總尚
書都省監印女五人長曰真適進士東勝程思
溫次嚴女冠詔為宮教號浯溪真隱次順早卒
次適成和郎大都惠民司提點太原翟國才次
適建德路織染局大使定襄霍繼祖銘曰士子
賈技爭綴緝僥倖寸祿奔走急以為詩文作無
益糞壤擲棄明月璧先生卓犖有異識振筆便
入蘇黃室開闢文源剪荆棘大聲復完金玉擊

爛漫長醉思盈溢瑞錦秋花亂堆積險妬護前
喘肝臆羣犬號號共讒嫉塵埃野馬為鬼域遺
山巖巖倚天壁國史興喪是吾職義烈不負董
狐筆定襄高寒拓跋國馬舛歸葬反玄宅有書
有卷俱未卒嗚呼先生端可惜嗚呼先生不可

得

按先生父格隴城令又云叔父陵川令先生集有望陵川詩自註云此縣先隴城府君舊

治則叔父即格也格以先生為嗣蓋令陵川時尚未子之耳三女順集中有示女珍詩云珠圓翠繞三花樹李白桃紅一捻春看取元家第

三女他年真作魏夫人順當作珍四女名柔

附元徐世隆遺山先生文集序文之為物何物
也造物者實靳之不輕畀人何哉蓋天地間靈
明英秀之氣萃聚之多蘊蓄之久挺而為人必
富於才敏於學精於語言能識天地萬物之情
極其變而歸之雅為詩為歌為賦為頌為傳記
為誌銘為雜言為樂府兼諸家之長頌一代之
興使斯文正派如洪河大川滾滾不斷以接夫
千百世之傳為造物者豈得而輕畀之哉竊嘗

評金百年以來得文派之正而主盟一時者大
定明昌則承旨党公貞祐正大則禮部趙公北
渡則遺山先生一人而已自中州斲喪文氣奄
奄幾絕起衰救壞衆望在遺山遺山雖無位柄
亦自知天之所以畀付者為不輕故力以斯文
為己任周流乎齊魯燕趙晉魏之間幾三十年
其迹益窮其文益富而其名益大以肆且性樂
易好獎進後進春風和氣隱然眉睫間未嘗以

行輩自尊故所在士子從之如市然號為汎愛
至于品題人物商訂古今則絲毫不少貸必歸
之公是而後已是以學者知所指歸作為詩文
皆有法度可觀文體粹然為之一變大較遺山
詩祖李杜律切精深而有豪放邁往之氣文宗
韓歐正大明達而無奇纖晦澁之語樂府則清
雄頓挫閒婉瀏亮體製最備又能用俗為雅變
故作新得前輩不傳之妙東坡稼軒而下不論

也嗚呼遺山今已矣靈明英秀之氣散在天壤
間不知幾年幾時復聚而為斯人乎東平嚴侯
弟忠傑喜與士人游雅敬遺山永其完集刊布
以大其傳云

附元李冶元遺山先生文集序唐開元間李邕
李白皆以文章鳴世邕之所至阡陌聚觀以為
異人衣冠尋訪門巷填噓白則王公趨風列獄
結軌羣賢翕習如鳥歸鳳是豈懸市相夸沽聲

索價而後得之哉要必有以漸漬其骨髓動盪其血氣藻鬯其襟靈故天下之人為之咨嗟淫泆鼓舞踴躍景附響合而不能自己吾友元君遺山其二李後身乎始齷齪能詩甫冠時名已大振尋登進士上第興定正大中殆與楊趙齊驅壬辰北還老手渾成又脫去前日畦畛矣君嘗言人品實居才學氣識之上吾與君言亦嘗謂天下之事皆有品繪畫園綦技之末也或一筆

之奇一著之妙固有終身北面而不能寸進者
彼非志之不篤習之不專也直其品不同耳如
君之品今代幾人方希刷羽天池揚光紫微不
幸邁疾而沒其遺文數百千篇藏於家雖有副
墨而洛誦者率不過得什一二其所謂大全者
曾莫見焉是以天下之大夫士歎焉若懷宿負
而未之償也東平嚴佐弟忠傑有文如淇澳好
善如干旄獨能求得其全編將鈐之梓且西走

書數百里命予序引予謂遺山之文之名有目
爭睹有耳咸聳庸何序為惟君有蓋棺之恨此
其可言者得以論述之主上鄴居藩邸挹君盛
譽一見遽欲處之太史氏不數歲神聖御天文
治蠅興稽古建官百度修舉其於玉堂東觀金
華延閣之選尤所注意者曷嘗不設燎以待之
而側席以求之哉向使遺山不死則登鑾坡掌
綸誥稱內相久矣奈何遇千載而心違際昌辰

而身往此非君遺恨也耶尚賴抑如京之賢有
慰韓吏部之志文工命拙雖抱憾於九原人亡
書存足騰芳於百世顧予朴學未暇顯評言念
舊遊聊為揚摧云爾中統三年陽月封龍山人
序

箕山

幽林轉陰崖鳥道人迹絕許君棲隱地唯有太古

一作荒

雪人間黃屋貴物外祇自潔尚厭一瓢喧重負寧所屑

降衷均義稟汨利忘智決得隴又望蜀有齊安用薛干
戈幾蠻觸宇宙日流血魯連蹈東海夷齊一作采薇蕨
至今陽城山衡華兩丘垤古人不可作百念肝肺熱浩
歌北風前悠悠送孤月

緱山置酒

同內翰馮丈叔獻雷兄
希顏賦詩分韻得賓字

靈宮肅清曉細柏含古春人言王子喬鶴馭此上賓白
雲山蒼蒼平田木欣欣登高覽元化浩蕩融心神西望
洛陽城大路通平津行人細如蟻擾擾爭紅塵蓬萊風

濟深鬢毛日夜新股勤一杯酒媿爾雲間人

光武臺

東南地上游荆楚兵四衝遊子十月來登高送長鴻當年赤帝孫提劍起蒿蓬一顧渚水斷再顧新都空雷霆萬萬古青天看飛龍歸然此遺臺落日荒煙重誰見經綸初指揮走羣雄白水日夜東石麟幾秋風空餘廣武歎無復雲臺功

潁亭留別

同李冶仁卿張肅子敬王元亮子正分韻得畫字

故人重分攜臨流駐歸駕乾坤展清眺萬景若相藉北
風三日雪太素秉元化九山鬱崢嶸了不受陵跨寒波
淡淡起白鳥悠悠下懷歸人自急物態本閒暇壺觴負
吟歡塵土足悲咤回首亭中人平林澹如畫

澗亭

春物已清美容懷自幽獨危亭一徘徊翛然若新沐宿
雲淡野川元氣浮草木微茫盡楚尾平遠疑杜曲生平
遠遊賦吟諷心自足竭來著世網抑抑就邊幅人生要

適情無榮復何辱乾坤入望眼容我謝羈束一笑白鷗
前春波動新綠

出京

史院得告歸
嵩山寺下

從宦非所堪長告欣得請驅馬出國門白日觸隆景半
生無根著飄轉如斷梗一昨隨牒來六月阻歸省城居
苦湫隘羣動日蛙黽慙媿山中人團茅遂幽屏塵泥久

一作免

相浣

一作浣

夢寐見清潁矯首孤飛雲西南路何永

元魯縣琴臺

荒城草木合破屋風雨侵千年一琴臺
睠焉涕盈襟遺愛食縣社公寧不堪任
此臺即甘棠忍使無餘陰旁舍高以華
大豪日捐金蒼雲玄武暮鬼物憑陰岑
尚德抑玄虛陸典誰當尋我興薦寒泉
百拜公來臨公來不能知落日下饑禽
懷哉空山裏鶴飛猿與吟當年于為歌
補袞一何深承平示得意獨能正哇淫
君相此一時又復悟良箴諛臣坐廢黜
盍亦起幽沈蒲輪竟顧轂香草空深林
寂寞授書室孤甥舉遺衾生平諒已然
薄俗矧

來今千山為公臺萬籟為公琴夔曠不竝世月露為知音人閒蹠涔耳已矣非公心

元道州文編以元魯山為元魯縣又臺今為玄武祠

故又之

古意二首

七歲入小學十五學時文二十學業成隨計入咸秦秦中多貴遊幾與書生親年年抱關吏空笑西來頻在昔學語初父兄已卜鄰跛鼈不量力強欲緣青雲四十有收豕五十有負薪寂寥抱玉獻賤薄倡優陳青衫亦區

區何時畫麒麟過合僅一二饑寒幾何人誰留章甫冠
萬古徒悲辛

桃李弄嬌嬈梨花澹丰容盈盈兩無語
風何許來草木誰青紅天公亦老矣何意夸兒童
花正開今朝花已空川流不冝駐并與繁華東
歲姿骭骭空谷中陽和不擇地亦復難為功
本無兒女心安用尤天公

贈答劉御史雲卿

學道有通蔽今人乃其尤溫柔與敦厚埽滅不復留高
塞當父師排擊劇寇讐真是未可必自私有足羞古人
相異同寧復操戈矛春風入萬物枯枿將和柔克己未
有加歸仁亦何由先儒骨已腐百罵不汝酬胡為文字
間刮垢搜癰疣吾道非申韓哀哉涉其流大儒不知道
此論信以不我觀唐以還斯文有伊周開雲揭日月不
獨程張儔聖途同一歸論功果誰優戶牖徒自闢

一作開

膠漆本易投九原如可作吾欲起韓歐

送欽叔內翰并寄劉達卿郎中白文舉編修二首
君性我所諳我心君所知凡我之所短君亦時有之謀
事恨大銳臨斷恨太遲持論恨太高徇俗恨太早入道
自近始貧富理不齊君自不得飽欲療何人饑乞醯乞
諸鄰聖哲有明譏被髮救鄉人智者所不為且如與人
交交有非所宜白黑不復擇豁豁傾心脾汎愛豈不可
後悔終自貽又如與人言寧復無失辭刺口論成敗白
眼談歌詩世故穀黃間能不發其機聞君作損齋似覺

豪華非慙忿與窳慾百年有良規與子各努力歲晚以
為期

古人遙相望每恨不同時同時得古人歡樂良在茲君
歸豈不佳交遊滿京師門前車馬來笑言慰所思細話
洛陽事高詠嵩山詩宮壺發新箚宮梅耿幽姿故應劉
與白亦復念微之

飲酒五首

襄城作

西郊一畝宅閉門秋草深牀頭有新釀意愜成孤斟舉

杯謝明月逢華肯相臨願將萬古色照我萬古心

去古日已遠百偽無一真獨餘醉鄉地中有羲皇淳聖
教難為功乃見酒力神誰能釀滄海盡醉區中民

利端始萌芽忽復成禍根名虛買實禍將相安足論驅
驢上邯鄲逐兔出東門離官寸亦樂里社有拙言

離官
寸亦

樂晉俚
諺云然

萬事有定分聖智不能移而於定分中亦有不測機人
生桐葉露見日忽已晞唯當飲美酒儻來非所期

此飲又復醉此醉更酣適徘徊雲間月相對澹以默三更風露下巾袖警微溼浩歌天壤間今夕知何夕

後飲酒五首

陽翟作

少日不能觴少許便有餘比得酒中趣日與杯杓俱一日不自澆肝肺如欲枯當其得意時萬物寄一壺作病知奈何妾婦良區區但媿生理廢饑寒到妻孥吾貧蓋有命此酒不可無

金丹換凡骨誕幻苦無實如何杯杓間乃有此樂國天

生至神物與世作酣適豈曰無妙理澠漾莫容詰康衢
吾自樂何者為帝力大笑白與劉區區頌功德

客從崧少來貽我招隱詩為言學仙好人間竟何為一
笑顧客言神仙非所期山中如有酒吾與爾同歸

酒中有勝地名流所同歸人若不解飲俗病從何醫此
語誰所云吾友田紫芝紫芝雖吾友痛飲真吾師一飲
三百杯談笑成歌詩九原不可作想見當年時

飲人不飲酒正自可飲泉飲酒不飲人屠沽從擊鮮酒

如以人廢美祿何負焉我愛靖節翁於酒得其天龐通
何物人亦復為陶然兼忘物與我更覺此翁賢

少林

雲林入清深禪房坐蕭爽澄泉潔餘習高鳥喚長往我
無玄豹姿漫有紫霞想回首山中雲靈芝日應長

劉曲龍潭

一無劉
曲二字

層冰積浩蕩陵谷低吞吐窈窕轉幽壑突兀開淨宇回
頭山水縣亦復墮塵土孤雲鐵梁北宇宙一仰俛風景

初不殊川塗忽修阻寒潭海眼淨黝黑自太古蟄龍何
年臥萬國待霖雨誰能裂蒼崖雷風看掀舉

山人歲旱則轉大

石入潭中以駭龍
驟息致雨故云

麥歎

借地乞麥種微倖今年秋乞種尚云可無丁復無牛田
主好事人百色副所求盼盼三百斛寬我饑寒憂我夢
溱南川平雲綠油油起來望河漢旱火連東州四月草
不青吾種良漫投田間一太息此歲何時周向見田父

言此田本良疇三歲廢不治

平聲

種則當倍收如何落吾

手羊年變雞猴身自是旱母咄咄將誰尤人滿天地間
天豈獨吾讐正以賦分薄所向因拙謀不稼且不耨取
禾亦何由辦作高敬通惡雨將漂流吾貧有濫觴賢達
未始羞單衣適至盱一劒又蒯緱焉知寄食餓不取丞
相侯作詩以自廣時用商聲謳

龍門雜詩

石樓繞清伊塵土天所限人言無僧久草滿不復剗灘

聲激悲壯山意出高蹇當年香山老挂冠遂忘返高情
留詩軸清話入禪版誰言海山去蕭散仍在眼溪寒不
可涉倚杖西林晚

豐山懷古

豐山一何高古屋蒼煙重開門望吳楚鳥去天無窮連
山橫巨鼇白水亘長虹川原鬱佳氣自古南都雄炎精
昔季興臥龍起隆中落落出奇策言言揭孤忠時事有
可論生晚恨不逢漢賊不兩立大義皎日同吳人操等

耳忍與分河潼奪操而與權何以示至公一民漢遺黎
尺地漢故封守民及守土天地與相終不能禦寇讐顧
以寇自功既異鴻溝初又非列國從一券捐一作損半產

二祖寧汝容端本一已失孤唱誰當從至今有遺恨廟
柏號陰風舊聞清泠淵天籟如撞鐘山徑野人語誕幻
欺孩童開元有亂階鹿飲溫泉宮黃猿何為者乃爾能
嘯兇乾坤之大音久鬱理當通清霜旦夕落佇爾驚羣

聲

孔明自謂漢室季興清泠淵
黃猿出見廟碑述開元事

乙酉六月十一日雨

一旱近兩月河洛東連淮驕陽佐大火南風卷黃埃草
樹青欲乾四望令人哀時時怪事發雨雹如李梅我夢
天河翻崩騰走雲雷今日復何日駛雨東南來元氣淋
漓中焦卷意已迴良苗與青穎鬱鬱無邊涯書生如老
農苦樂與之偕閭閻聞吉語一笑心顏開酉年酒如漿
乾溢安能裁一作裁惟當作高廩多具罇與壘家人笑問
我君田安在哉駛雨與快同音見魏志

觀浙江漲

浙水今在鄞陽見水經注非浙江也

一旱千里赤一雨垣屋敗浙故以江名暴與衆壑會初
驚沙石卷稍覺川谷隘雷風入先驅大塊供一噫千帆
鼓前浪萬馬接後派崩崖不暇顧拔木無留礙憑陵如
藉勢洄洑各有態平分乍舒徐怒觸忽碎壞雲蒸楚樹
杪雪映商嶺背髣髴千丈潮恍與海門對飲飛鬬蛟鱷
燃犀出鱗介陽侯富陰族萬首露光怪翠蕤澹偃蹇鉦
鼓亂碣磳永懷疏鑿力重歎神禹大乾坤海為壑未礙

變橫潰納汙非無處流惡聊自快投詩與龍盟滌蕩煩

一再

時拜大赦五日矣

鸛雀崖北龍潭

層崖閼頽陰水木深以阻湍聲半空落洶洶如怒虎風
生木葉脫魄動不敢語何年渾沌竅靈物此棲處初從
一綫溜開鑿到神禹雲雨鼓飛浪噴薄齊萬弩藏珠驪
龍領百斛快一吐油油入無底細散不濡縷歸藏海有
穴汎溢愁下土南峯天一柱萬古鎮幽府江山有奇探

落景迫行旅多慙如芝人終年看飛雨

五松平

竹港晨露白石門秋氣寒湍流落澗壑細路深茅管江
平白石出竟日沿清灣四顧不見人山鳥時聞關蒼崖
入地底煙靄青漫漫力盡不能過却坐空長歎青天白
雲閒可望不可攀虛名竟何得行路乃爾難

贈荅楊煥然

詩亡又已久雅道不復陳人人握和璧燕石誰當分關

中楊夫子高誨世所聞十年玄尚白藜藿甘長貧有來
河水篇四海副斯文斯文有定在桓生知子雲古來知
已難萬里猶比鄰十人國中和要非心所親東楚西南
秦望君勞我神相逢不得語別去徒殷勤白雲不可贈
相思秋復春

送詩人李正甫

陽和入枯株靄靄含芳津山頭太古石不與萬物春朝
從木客遊暮將山鬼鄰紫芝僅盈掬幽蘭不充紉青雲

入長吁肝膽空輪囷我嘗讀君詩天趣觸眼新秦遊得
豪宕晉產餘真淳怒虎不受唾駭鹿未易馴安坐誰不
如半生走逡巡蒼蒼不可問藐藐誰當親青山礪為塵
白日無閒人空歌東野曲不救西州貧

曉發石門渡湍水道中

水經端音專

疎星澹秋明陰霞絢朝映積雨成坐愁晨光動幽興石
門歸馭引湍浦漁舸竝曠蕩萬景新歸藏四山靜平湖
風漪綠遠岸秋沙淨洋洋游魚一作鱗逝汎汎輕鷗泳隱

顯非夙心感遇一作寓見真性倦遊時自悼違己將安竟

憂端從中來茫茫發孤詠

放言

韓非死孤憤虞卿著窮愁長沙一湘纍郊島兩詩囚人
生定能幾肺肝日相讐井蛙奚足論禪蟲良足羞正有
一朝樂不償百年憂古來帝王師或從赤松遊大笑人
間世起滅真浮漚曾是萬戶封不博一掉頭有來且當
避未至吾何求悠悠復悠悠大川日東流紅顏不暇惜

素髮忽已稠我欲升嵩高揮杯勸浮丘因之兩黃鵠浩
蕩觀齊州

黃公廟

羈客無恒居六月走長路清風黃公祠地古欣所遇劍
飛素靈哭龍躍雲雨赴堂堂文成君談笑取帝傅功名
要有命陰相果何預誰謂圯上人異事驚竹素河清不
可俟筋力疲世故袖間一編書塵埃歎遲暮

學東坡移居六首

誰謂我屋寬寢處無復餘誰謂我屋小十口得安居南
榮坐諸郎課誦所依於西除著僮僕休沐一作得自如
老我於其間兀兀窮朝晡起立足欠伸偃臥足展舒窗
明火焙暖似欲忘囚拘屋前有隙地客舍不可無花闌
及菜圃次第當耘鋤東野載家具家具少於車我貧不
全貧尚有百本書

故書堆滿牀故物貯滿箱渾渾商寶鬲累累漢銅章杖
飾昭敬恭嚴卯訶痺剛雷文繞杖節獸面出珮璜私印

刻王尊玉斗蛟龍翔逸少留半紙魚網非硬黃亦有曇
首帖不辨作雁行雪景瘡思物宣政舊所藏晉公古漁
父浩歌濯滄浪因觀宮騎圖臥馳識提囊谿石含餘潤
奚墨凝幽香南榮挂風響雲裾珮鏗一作鏘鏡背先秦
書八字環中央讀之三歎息此日何時光

壬辰困重圍金粟論升勺明年出青城瞑目就束縛毫
釐脫鬼手攘臂留空橐脚城千里外狼狽何所託諸公
頗相念餘粒分鳬鶴得損不相償坏土填巨壑一冬不

製衣繒纈如紙薄一日僅兩食強半雜藜藿不羞蓬累
行粗識瓢飲樂敵貧如敵寇自信頗亦慙兒唬飯糶空
堅陣為屢却滄溟浮一葉渺不見止泊五窮果何神為
戲乃爾虐

舊隱嵩山陽筍蕨豐餽餉新齋浙江曲山水窮放浪乾
坤兩茅舍氣壓華屋上一從陵谷變歸顧無復望漁樵

一作
樵漁憶往還

一作
還往

風土夢閒曠恍如悟前身姓改心不

忘去年住佛屋盡室寄尋丈今年僦民居臥榻礙盆盎

靜言尋禍本正坐一出妄青山不能隱俛首入羈鞅巢
傾卵隨覆身在顏亦強空悲龍髯絕永負魚腹葬置錐
良有餘終身志悲愴

一作
懣創

國史經喪亂天幸有所歸但恨後十年時事無人知興
廢屬之天事宜盡乖違傳聞入讐敵祇以興罵譏老臣
與存亡高賢死兵饑身死名亦滅義士為傷悲哀哀淮
西城萬夫甘伏屍田橫巨擘耳猶為談者資我作南冠
錄一語不敢私稗官雜家流國風賤婦詩成書有作者

起本良在茲朝我何所營暮我何所思胸中有如噎欲
得快吐之溼薪煙滿眼破硯冰生澌造物留此筆吾貧
復何辭

此州多寓士論年悉肩隨風波同一舟奚必骨肉為倪
家蓮花白每釀必見貽季昌妙琴事足以相娛嬉郭侯
家多書篇帙得偏窺趙子篤於學間以問所疑王生舊
鄰舍窮達心不移千里訪存歿十口分寒饑獨有仲通
甫天馬不可羈直以論詩文稍稍窺藩籬永懷王與李

朔漢行當歸書來聞苦語報我脫繫維慚非一狐腋不
直五穀皮我作野史亭日與諸君期相從一笑樂來事
無庸知

濟南廟中古檜同叔能賦

亭亭祠宮檜鬱鬱上雲雨扶持幾年造物心獨苦青
餘玉川潤根入鐵岸古雖含棟梁姿斤斧安得取沈湫
地中久駭浪思一鼓天柱屹不移水國奠平土乾坤此
神物甲乙存世譜瀨鄉留耳孫闕里傳鼻祖秦松徒自

汙蜀柏聊共數會待十抱成茲焉重摩撫

別李周卿二首

行路澀於棘單車望千山歌君歸雲曲清涕留餘潛六年河朔州動輒得謗訕惟君篤高義日來歎柴關古交松柏心今交桃李顏古人去不返古道挽不還相思一尊酒幽恨寄山間

城居日鼃鼃局促復局促去作山中客放浪誰檢束溪光淡於冰山骨淨如玉懷我同心人團茅住深竹垂綸

鮮可食種秫酒亦足石壇三萬丈醉眼天一粟安得萬

里風相從兩黃鵠

周卿學有淵源東州詩人未見其比與予約西游如詩中所說

九日讀書山用陶詩露淒暄風息氣清天曠明為

韻賦六詩

行帳適南下居人跼庭戶城中望青山一水不易渡今
朝川涂靜偶得展衰步蕩如脫囚拘廣莫開四顧半生
無根著筋力疲世故大似丁令威歸來歎墟墓鄉閭喪
亂久觸目異平素粉榆雖尚存歲晏多霜露

山腰抱佛剎十里望家園亦有野人居層崖映柴門昔
我東巖君曾此避塵喧林泉留杖屨歲月歸琴樽翁今
為飛仙過眼幾寒暄蒼蒼池上柳青衫見諸孫疎燈照
茅屋新月入頽垣

二句先
人詩

依依覽陳迹惻愴不能言

宇宙有此山閱世過鳥疾何人不此游名姓寧復識茲
辰世所重前代多盛集柴桑有故事二謝留俊筆并數
孟與桓此外誰記憶人生百年內踏地皆陳迹獨惟我
輩人興懷念今昔山林與泉

一作
泉

環自古長太息

往年在南都閒閒主文衡九日登吹臺追隨盡名卿酒
酣公賦詩揮灑筆不停蛟龍起庭戶破壁春雷轟堂堂
髯御史痛飲益精明亦有李與王玉樹含秋清我時最
後來四座頗為傾今朝念存歿壯心徒自驚

我在正大初作吏浙江邊山城官事少日放浙江船菊
潭秋華滿紫稻釀寒泉甘腴入小苦幽光出清妍歸路
踏明月醉袖風翩翩父老遮我留謂我欲登仙一別半
山亭回頭餘十年江山不可越目斷西南天

吾山一何高，清涼屹相望。
龍頭出白堦，佛屋壓青嶂。
雲光見秋半，旭日發毫相。
我我寶樓閣，金界儼龍象。
鄉曲二十年，香火闕瞻向。
金花香繇芊，夢想雲雨上。
福田行欲近，重為詩酒障。
終當陟層巔，放眼天宇曠。

梨花海棠二首

梨花如靜女，寂寞出春暮。
春工惜天真，玉頰洗風露。
素月淡相映，蕭然見風度。
恨無塵外人，為續雪香句。
孤芳忌太潔，莫遣凡卉妒。

妍花紅粉妝意態工媚嫵窈窕春風前霞衣欲輕舉金
盤渺華屋國豔徒自許依依如有意脈脈不得語詩人
太冷落愁絕殘春雨

題張左丞家范寬秋山橫幅

層崖閼長陰細徑緣絕巘梯雲闌干峻廓廓清眺展斜
陽半天赤飛鳥大江遠清霜張秋氣草樹生意翦風雪
斫堅敵旗旆紛仆偃崢嶸峰巒出莽蒼林薄晚盤盤范
家筆老懷寄高蹇經營入慘淡得處乃蕭散嵩丘動歸

興突兀青在眼何時臥雲身團茅遂疎嬾

宿張靖田家

地屬壽陽

川涂盡坡陀嶺路入荒梗微茫望烟火向背得廬井殘
民安撲陋倦客喜幽屏兒童聞叩扉租吏有餘警兩崖
紛叢薄砂石立頑獷湍流落空嵌百折一作道不容騁山

深饒風露夜氣淒以耿園花淡相望邊月空照影深居
苦不早素髮忽垂領誰謂林野人茲焉惜清景

寶嚴紀行

陰崖轉清深秋老木堅瘦城居望已遠步覺脫氛垢寶
巖夙所愛丈室方再叩曛黑纔入門逕就石泉漱遙遙
金門寺寶焰出巖竇我豈無盡公昔見今乃又同來二
三子寢飯故相就況有杜紫微琴筑終雅奏曛曛上初
日深樾炯穿漏逶迤陟西巘萬景若迎候絕壁三面開
仰看勞引脰兩山老突兀屹立柱圓覆諸峰出頭角隨
起隨偃仆不可無煙霞朝暮為先後橫亘連巨鼇飛墮
集靈驚九華與奇巧五老失渾厚想當位置初遂欲雄

宇宙太行有缺谷勝絕無出右大似塵外人眉宇見高
秀哀湍下絕壑電激龍怒鬬崩奔翻雪窖瑩滑瀉瓊甃
窮源得懸流偉觀駭初邁仙人寶樓閣白雨散檐溜天
孫拂機絲素錦絢清晝永懷登高賦意匠一作頗困馳驟
窘於游暴秦百說不一售林間太古石稍復杯飲舊已
約銘窪尊細鑿留篆籀茲山緣未了僧夏容宿留終當
勾餘年奇探盡雲岫

雁門道中書所見

金城留旬浹兀兀醉歌舞出門覽民風慘慘愁肺腑去
年夏秋旱七月黍稷吐一昔營幕來天明但平土調度
急星火逋負迫捶楚網羅方高懸樂國果何所食禾有
百騰擇肉非一虎呼天天不聞感諷復何補單衣者誰
子販糶就南府傾身營一飽豈樂遠服賈盤盤雁門道
雲澗深以阻半嶺逢驅車人牛一何苦

同白兄賦瓶中玉簪

畏景衆芳歇仙葩此夷猶冰姿出新沐娟娟倚清秋昨

夢今見之風鬟玉搔頭誰言閨房秀高情渺林丘碧筵

一作筵

古銅壺一室香四周懷人成獨詠遠思徒悠悠

野史亭雨夜感興

私錄關赴告求野或有取秋兔一寸毫盡力不易舉衰
遲私自惜憂畏當誰語展轉天未明幽窗響疎雨

繼愚軒和党承旨雪詩二首

今古幾詩人擾擾劇毛粟吾愛陶與韋泠然扣冰玉大
雅久不作聞韶信忘肉求音扣寂寞一歎動鄰屋水風

清鶴夢月露洗蟬腹白頭兩遺編吟唱心自足誰為起
九原寒泉薦芳菊

愚軒具詩眼論文貴天然頗怪今時人雕鐫窮歲年君
看陶集中飲酒與歸田此翁宣作詩直寫胸中天天然
對雕飾真贗殊相懸乃知時世妝粉綠徒爭妍一作
憐枯
淡足自樂勿為虛名牽

寄英禪師時住龍門寶應寺

我本寶應僧一念墮儒冠多生經行地樹老井未涸一

窮縛兩脚寸步百里難空餘中夜夢浩蕩青林端故人

今何如念子獨輕安孤雲望不及冥鴻杳難攀前時得

君詩失喜忘朝餐想君亦念我登樓望青山山中多詩

人杖屨時往還但苦詩作崇況味同酸寒清涼詩最圓

相和尚往往似方干半年臥牀席瘡我疥亦頑本草松

脂塗疥頑者三兩皮濟甫詩最苦僧源字濟甫宋州人寸晷不識閒傾身營

一飽船上八節灘安行詩最工慕容安行山陽人臨潼簿六馬鳴和

鸞鬱鬱饑寒憂慘慘日在顏老秦詩最和秦略字簡夫陵川人平

易出深艱脫身豺虎叢白髮罹惇鰥張侯詩最豪

前登封令

張致字景賢雲中人驚風卷狂瀾竅繁天和洩外腴中已乾城中

崔夫子


崔遵字懷祖燕人

老筆鬱盤盤家無儋石儲氣壓風騷

壇我詩有凡骨欲換無金丹呻吟二十年似欲見一斑
大笑揶揄生已復不相寬愛君梅花篇入手如彈丸愛
君山堂句深靜如幽蘭詩僧第一代無姚百年間思君
復思君恨不生羽翰何時溪上石清坐兩蒲團

夢歸

虛庭霜夜寒落葉風自埽
恍如南窗月坐失西山道
長安佳麗地遊子自枯槁
人生家居樂學稼苦不早
衡門眼中見歸意滿秋草
夜長夢已盡愁絕令人老



御訂全金詩增補中州集卷六十三

欽定四庫全書

集部

御訂全金詩增補中州集卷六十四

詳校官中書_臣張虎拜

主事銜_臣徐以坤覆勘

總校官編修_臣王燕緒

校對官編修_臣勵守謙

謄錄監生_臣黃嘉績

欽定四庫全書

御訂全金詩增補中州集卷六十四

元好問二

秋蠶

室人筐中無寸縷一箔秋蠶課諸女朝來飼却上馬桑
隔簇仍聞竹間雨阿容阿璋墨滿面畫徹灰城前致語
上無蒼蠅下無鼠作繭直須如甕許東家追胥守機杼
有桑有稅吾猶汝官家却少一絢絲未到打門先自舉

南溪

南溪酒熟清而醇北溪梅花發興新前年去年花下醉
今年冷落花應嗔梅花娟娟如靜女寂寞甘與荒山鄰
詩人愛花山亦好幽林穹谷生陽春風鬟峨峨一尺雲
芳香幽臥如相親山堂夜半北風惡一點相思愁殺人

范寬秦川圖

張伯玉歿後同
麻澁君知幾賦

亂山如馬爭欲前細路起伏蛇蜿蜒秦川之圖范寬筆
來從米家書畫船變化開闔天機全濃淡覆露清而妍

雲興霞蔚幾千里著我如在峩眉巔西山盤盤天與連
九點盡得齊州烟浮雲未清白日晚矯首四顧心茫然
全秦天地一大物雷雨瀕洞龍頭軒因山分勢合水力
眼底廓廓無齊燕我知寬也不辨此渠寧有筆如修椽
紫髯落落西溪君長劍倚天冠切雲望之見之不可親
元龍未除湖海氣李白豈是蓬蒿人愛君恨不識君早
乃今得子胸中秦作詩一笑君應聞

予七年前過郾城
伯玉知予來而都

無賓主意予亦偃蹇而去爾後雖願交而髯沒矣未嘗
不以為恨也今日予思兄弟出此圖求予賦詩酒惡無

脚中勉為賦此畫本米元章家物有韓子蒼題名元章以為中立而元暉以為中正以予觀之此特張鼻胸中物耳知者當不以吾言為過云

寄答溪南詩老辛愿敬之

五年不喚溪南渡日夕心馳洛西路
山中今日見君詩惆悵良辰又相誤
龍蛇大澤變風景虎豹天門鬱烟霧
丈夫不合把鉏犁青鬢無情忽衰素
平泉漫作窮愁志笠澤休題自憐賦

陸龜蒙有自憐賦

長安正有五侯鯖骭醢誰

能作樓護青燈老屋深蓬蒿蝙蝠掠面莎雞號劍歌夜

半激悲壯松風萬壑翻雲濤區區墓上曹征西我知慚
媿王東皋人生只有一杯酒螟蛉螺贏安能豪

西園

興定庚辰
八月中作

西園老樹搖清秋畫船載酒芳華游登山臨水祛煩憂
物色無端生暮愁百年此地旃車發易水迢迢鴈行沒
梁門回望繡成堆

時金主遷
都于汴

滿面黃沙哭燕月熒熒一

炬殊可憐

蒙古破金燕都焚
宮室火一月不滅

膏血再變為灰烟富貴已

經春夢後典刑猶在

一作見

靖康前當時三山初奏功三

山宮闕雲錦重壁月瓊枝春色裏畫闌桂樹雨聲中秋
山秋水今猶昔漠漠荒烟送斜日銅人攜出露槩來人
生一作豈無情淚沾臆麗川亭上看年芳更為清歌盡此
鵬千古是非同一笑不須作賦擬阿房

雙峯競秀圖為參政楊侍郎賦

紅烟霏霏雲拂石山木蕭蕭山鬼泣江岸人家失南北
兩峯突兀何許來元氣淋漓洗秋碧畫家晴景費經營
共愛移山入杳冥安得北風吹雨去倚天長劍看崢嶸

二月十五日鶴

九龍岡上玄元祠人言尊像神所遺年年二月降靈鶴
來無定數有定期城頭曉露生新警萬首望穿雲際影
不知濁世誰下臨只許霜毛見修整石壇花落松風冷
戛然長鳴人語定百年薰老誇見聞萬里黃冠赴靈應
只從游騎突重圍城郭并與人民非可憐殿荒烟一作
墟裏無復當年丁令威

閻商卿還山中

阿卿去月從我來今日西山成獨往野人不是城中物
澗飲巖棲夢餘想翰林溼薪爆竹聲待詔履穿沾雪行
蘭臺從事更閒冷文書如山白髮生孤燈靜照寒窗宿
北風夜半歌黃鵠田家閉門風雪深梅花開時酒應熟
半世虛名不療貧棲遲零落百酸辛憑君莫向山中說
白石清泉笑殺人

鄧州城樓

鄧州城下湍

音專

水流鄧州城隅多古丘隆中布衣不復

見浮雲西北空悠悠長鯨駕空海波立老鶴叫月蒼烟
愁自古江山感遊子今人誰解賦登樓

宛丘歎

秦陽陂頭人迹絕荻花茫茫白於

一作如

雪當年萬家河

朔來盡出牛頭入租帖蒼髯長官錯料事下考大笑陽
城拙至今三老背腫青死為逋懸出膏血君不見劉君
宰葉海內稱饑摩寒撫哀孤惻碑前千人萬人泣父老
夢見如平生冰霜紉袴渠有策如我碌碌當何成荒田

滿眼人得耕詔書已復三年征早晚林間見雞犬一犂

春雨麥青青

韓李令南陽配流民以牛頭租迫而逃者萬餘家劉雲卿御史宰葉除逃戶稅三萬

斛百姓為之立碑頌德賢不肖用心相遠如此李之後十年予為此縣大為逋懸所困辛卯七月農司檄予按秦陽陂田感而賦詩李與劉皆家宛丘故以宛丘歎命篇

遊黃華山

黃華水簾天下絕我初聞之雪溪翁丹霞翠壁高歡宮

銀河下濯青芙蓉昨朝一遊亦偶爾更

一作又

覺摹寫難

為功是時氣節已三月山木亦立無春容湍聲洶洶轉

絕壑雪氣凜凜隨陰風懸流千丈忽當眼芥蒂一洗平
生胸雷公怒擊散飛電日脚倒射垂長虹驪珠百斛供
一瀉海藏翻倒愁龍公輕明圓轉不相礙變見融結誰
為雄歸來心魄為動蕩曉夢月落春山空手中仙人九
節杖每恨勝景不得窮攜壺重來巖下宿道人已約山
櫻紅

密公寶章小集

天東長白大寶幢天河發源導三江有木蔽映山朝陽

云誰巢者雛鳳凰雲間吐氣日五色百鳥不敢言文章
名都盤盤魏大梁黃金甲第羅康莊王家書絕畫亦絕
欲與中祕論低昂密公書院無絲簧窗明几潔凝幽香
元光以後門鑰廢文士稍得連壺觴客來喜色浮清揚
典衣置酒餘空箱生平俊氣不易降眼中俗物都茫茫
淵明素琴嵇阮酒妙意所寄誰能量在昔武元握乾綱
扶桑為弓射八荒獵取一作兩國如驅羊民風朴魯資
驚彊文洽未及武尅剛興陵之孫越王子天以人瑞歸

明昌十三執經侍帝傍十八健筆凌阿房撐腸文字五千卷靈臺架構森鋪張高陽苗裔襲衆芳胡不置之貢玉堂袖中正有活國手地下纔得修文郎悲風蕭蕭吹白楊丘山零落可憐傷承平故態耿猶在拂拭寶墨生輝光恰似如菴連榻坐一甌春露澹相忘

明昌寶玩摩玉中秘內府

圖書印也越邨有柳公權紫絲鞵歐率更海上楊凝式乞花寄帖然獨推元章華佗為古今絕筆宋畫譜山水以李成為第一國朝張太師浩然上內翰子端奉旨品第書畫謂成筆意繁碎有畫史氣象次之荆關范許之下密公識賞超詣亦以此論為公郭乾暉崔棘公以為當在太古無上唐以來諸人筆虛筆實皆非其比故予

詩及之樛軒公自號也又所居有如菴詩集號如菴小
藁越王諸子惟樛軒貧甚典衣沽酒之句蓋實錄云甲
午三月二十有一日為輔之
書于聊城至覺寺之寓居

荆棘中杏花

牆東荒蹊抱邨斜荆棘狼籍盤根芽何年丹杏此留種
小紅濺濺爭春華野人慣見漫不省獨有詩客來咨嗟
天真不到鉛粉筆富豔自是宮闈花曲池芳徑非宿昔
蒼苔濁酒同天涯京師惜花如惜玉曉檐賣徹東西家
杏花看紅不看白十日忙殺遊春車誰家園亭有此樹

鄭重已著重幃遮阿嬌新寵貯金屋明妃遠嫁愁清笳
落花紫簾拂牀席亦有飄泊沾泥沙天公無心物自物
得意未用相陵誇黃昏人歸花不語惟有落月唬栖鴉

送張君美往南中

南朝詞臣北朝客棲遲零落無顏色陽平城邊握君手
不似銅駝洛陽陌去年春風吹鴈迴今年鴈逐秋風來
春風秋風鴈聲裏行人日暮心悠哉長江大浪金山下
吳兒舟船疾於馬西湖十月賞風煙想得新詩更瀟灑

贈休糧張鍊師

金砂霧散風雨疾一點黃金鑄秋橘中林宴坐人不知
野鹿銜花蜂課蜜富兒盤饌羅羶葷擾擾飛蠅復聚蚊
見說西山好薇蕨一枝青竹願隨君

讀書山雪中

前年望歸歸不得去年中途脚無力殘生何意有今年
突兀家山墮眼前東家西家百壺酒主人捧觴客長壽
先生醉袖挽春迴萬落千邨滿花柳山靈為渠也放顛

世界幻入兜羅綿似嫌衣錦太寒乞別作玉屑粧山川
人言少微照鄉井準備黃雲三萬頃何人辦作陳瑩中
來與先生共炊餅

陳先生貶官後荅京師人書云南州
有何事今年好雪明年炊餅大耳

過晉陽故城書事

惠遠祠前晉溪水翠葉銀花清見底水上西山如臥屏
鬱鬱蒼蒼三百里中原北門形勢雄想見城闕雲烟中
望川亭上閱今古但有麥浪搖春風君不見繫舟山頭
龍角禿白塔一推城覆沒薛王出降民不降屋瓦亂飛

如箭鏃汾流決入大夏門府治移著唐明邨只從巨屏
失光彩河洛幾度風烟昏東闕蒼龍西玉虎金雀觚稜
上雲雨不論民居與官府仙佛所廬餘百所鬼役天財
千萬古爭教一炬成焦土至今父老哭向天死恨河南
往來苦南人鬼巫好機祥萬夫畚鍤開連岡官街十字
改丁字釘去聲破并州渠亦亡幾時却到承平了重看官
家築晉陽

蟾池

老蟆食月飽復吐天公一目頻年替下界新增養蟾戶
玉斧誰憐修月苦郡國蟾池知幾所碧玉清流水仙府
小蟾徐行腹如鼓大蟾張頤怒於虎渠家眉間有黃乳
膏梁大丁正須汝何人敢與月復讐疾過池頭不容語
向來屬私今屬官從今見蟆當好看爬沙即上青雲端
高門關

高門關頭霜樹老細路千山萬山繞亂餘邨落不見人
雪霰霏霏暗清曉莘川百里如掌平閒田滿眼人得耕

山中樹藝亦不惡誰遣多田知姓名許李中楊竟何得

只今惟有石灘聲

許致忠楊湯臣中伯勝李仲常名宦四家隱盧氏時以多田推之亂後俱

不知所
在矣

甲辰秋洛陽得黃葵子種之南菴明年夏六月作

花佛經所謂閻浮檀金明淨柔軟令人愛樂者此

花可以當之因為賦長韻予方以病止酒故卒章

及之

芳蕤氾露嬌黃濕五疊湘裙輕褰積晨妝午醉一日間

白白紅紅總狼籍上陽宮女要頭冠摹寫雖工破的難
看來明淨復柔軟花中乃有閨浮檀千里移根洛陽陌
主人不飲誰看客乞與金杯自傾側明年為渠當舉白

雲峽

并序

君璋啓事西涼占對稱旨其還也行臺公以宣和
寶石為貺奇秀溫潤信天壤間之尤物君璋目之
曰雲峽邀詞客賦詩予亦同作

石盆清冷貯秋水水面蒼烟飛不起一堆寒碧几研間

寶氣崢嶸插箕尾山中雪浪空影像長安鸚鵡猶紈綺
枉著奇章甲乙中槁項纔堪把耕耒不知天壤此尤物
鬼刻神剗通有幾薰蒸似欲出泉脈瑩滑定應凝石髓
剝裂雲華漬月秋辛苦詩仙費摹擬車箱箭筈連西東
仇池百穴總玲瓏飛墮不嫌靈鷲小奇探已覺太湖空
故都喬木今如此夢想熙春百花裏膏血網船枯九州
亡國愁顏為誰洗主人天質粹以溫天然與山作知聞
退食從容北窗臥今古起滅真浮雲

雲巖 并序

觀州倅武伯英崞縣人少日舉進士有詩名其賦
翦燭刀有曉殘瘦玉蘭心吐蹴落春紅燕尾香之
句甚為時輩所稱家故饒財第宅園亭為河東之
冠貯書有萬卷樓嘉花珍果悉自他州移植為人
多伎巧山水雜畫斲琴和墨皆極其工嘗得宣和
湖石一竅竅穿漏殆若神剗鬼鑿炷香其下則烟
氣四起散布槃水上濃淡霏拂有烟江疊嶂之韵

吾鄉衣冠家法書名畫及藏書之多亦有伯英相
上下者伯英獨恃寶石以擅奇汾晉門耳興定末
伯英沒於關中楊戶部叔玉購石得之壬辰圍城
中以示予且命作詩危急存亡之際不暇及也乙
巳冬十一月來東平過聖與張君之新軒而此石
在焉聖與名之曰雲巖予問石所從來聖與言夏
津王帥得之汴梁泥塗中而以見貽予因歎一物
之微經歷世變遷徙南北乃復為好事者之所寶

玩似不偶然乃為詩道其故聖與三世相家以文章名海內其才情風調不減前世賀東山晏叔原故卒章以蕭閒明秀峯故事屬之

壺中九華玉孌顏紫烟著水往復還小窗虛明淡相對
不數漢宮銅博山會稽禹穴深無底寶石偷來定山鬼
一堆寒碧殊不凡滿谷春雲更堪喜阿欣秀發見眉宇
小杜才情淪骨髓摩挲不作儿上看繚白紵青便千里
渾沌日鑿餘空嵌漏天蒸濕饒風嵐世外元無種香國

海南真有補陀巖觀州愛玩頻湔祓民部平生幾熏沐
藏舟夜壑未厭深竟作新軒坐中物一天星斗入金蹲
翠射娉婷自有人只欠宣和鄭先覺為君留寫五湖真

天涯山

九州上游推大鹵獨恨山形頗推魯天涯一峯今日看
快似昂頭出環堵何年氣母此融結鬼鑿神劖未奇古
八窗玲瓏透朝日洞穴慘澹藏雷雨名花錦石粲可喜
乞與雲烟相媚嫵半空擲下金芙蓉想得飛來自玄圃

傳聞絕頂更靈異云是清都羣玉府五雲飛步吾未能
風袂泠泠已輕舉東州死愛華不注向在陋邦何足數
敬亭不著謝宣城斷岸何緣比天姥酒船何時朝復暮
倒卷滄沱浣塵土喚起山靈搥石鼓漢女湘妃出歌舞
詩狂他日笑遺山飯顆不妨嘲杜甫

山有石
鼓神祠

王右丞雪霽捕魚圖

江雲混混陰晴半沙雪離離點江岸畫中不信有天機
細向樹林枯處看漁浦移家媿未能扁舟蕭散亦何曾

白頭歲月黃塵底笑殺高人王右丞

世宗御書田不伐望月婆羅門引先得楚字韻

瑤光樓前按歌舞桂樹秋香月三五白頭誰解記開元
四海歡聲自簫鼓兩都秋色皆喬木三月阿房已焦土
天人亦有離別情可是田郎心獨苦承平舊物霓裳譜
寶氣暉暉映千古銀橋望極竟不歸滅沒燕鴻下平楚

贈別孫德謙

津橋垂楊雪花白挽斷春衫苦留客西河一雨春意濃

絕似銅駝洛陽陌河亭轟醉臥春風到手金杯不放空
鵲山一帶傷心碧羨殺孫郎馬首東

太原贈張彥遠

并州城邊十月末清霜稜稜風入骨因君夜話吳江春
酒光潑灩金杯滑閒閒騎鯨去滅沒當年愛君俊於鵲
平生我亦識翁人惆悵流年如電抹官家新築文昌臺
蒼生不憂墮巔崖眼看東閣奇士滿如君豈得藏蒿萊
晨雞未鳴子當發明星煌煌大於月野夫一笑冠纓絕

鹿泉新居二十四韻

土門西邊井陘渡野日荒荒下汀樹榆關石嶺都幾程
客夢往往迷歸路塵埃風雨半生過儘著筋骸支世故
寧州假館又兩年未保東來不西去山城百家家有山
靚面呈山誰一顧賣書買得呂氏園不謂全山舉相付
北崖老作土灰色擁腫形模一夸父娟娟正有小峨嵋
却立不容親杖屨就中抱犢尤峭拔望見韓山即攀附
韓王砦頭四望闊全趙纔如米數聚眼中麾蓋天上來

泚水鼓旗紛偃仆漢家威靈萬萬古石子連岡猶虎距
夏秋衆壑會鹿泉浩浩湍聲瀉餘怒西南諸峯不知數
蕩海鯢僵尻背露霏烟空翠有無中百態陰晴變朝暮
靈巖龍泉曾一到獨欠封龍展衰步學仙不愛徐童花
李相書龕心所慕平生懷抱向山盡老氣崔嵬如有助
巖居枯寂朝市喧喧寂兩間差有趣得行固願留不惡
流坎且當隨所遇何曾萬錢何用許方丈有山容下筍
管城初無食肉相黃帽非供折腰具明年高築野史亭

天已安排看山處多

一作尚

慙不及謝宣城標出敬亭天

一柱

一本二句在方丈有山容下筋之下

王學士熊岳圖

洗參池水甜於蜜玉堂仙翁髮如漆膝前文度更風流
盡卷風流入詩筆長松手種欲摩天海岳樓空落照邊
古來說有遼東鶴仙語星星誰為傳五百年間異人出
却將錦繡裹山川

去歲君遠遊送仲梁出山

去歲君遠遊今年客他州青天萬古一明月只與行人

生暮愁問君遊何許情多地僻

一作
遐

今徧處處金鞭斷

折騏驎死萬里長鴻思一舉憶初識子梁王臺清風入

坐無纖埃華岳峯尖見秋隼金眸玉爪不凡材西園日

晴花滿烟五雲樓閣三山巔玉樹瑤林照春色青錢白

璧買芳年三年一夢南陽道汴水迢迢入秋草挈雲心

事人不知千首新詩怨枯槁破屋仰見星疎衾風露清

匣中有長劍為君鳴不平泥塗久辱思一濯去去舉足

皆清冷鄧州大帥材望雄愛客不減奇章公軍中宴酣
茄鼓競銀燭吐焰如長虹幕中多士君又往談笑已覺
南夷空東州春迴十月後梅花分香入春酒平生得意
欽與京青眼高歌望君久浙江南下青汭石門細路
蒼烟屯五松平頭白日靜千山萬山如亂雲菊源不逐
時事改芝嶺自與商顏鄰他日相思一回首漁舟時問
武陵人

欽謂欽叔京即京父也
樂天書以微之為微

此日不足惜

此日不足惜此酒不可無頗怪昌黎公亦復為世儒天生至神物與人作華胥一酌舌本強二酌燥吻濡三酌動高興四酌色數腴連縣五六酌枯腸潤如酥眼花耳熱後萬物寄一壺十酌未渠央百觚亦奚拘人生一世間忽若過隙駒有酒不解飲問君誰與娛君不見東家騎鯨李膽滿六尺軀萬言黃石策八陣夔州圖酒酣起舞不稱意長吁青雲指夷吾又不見西家紫髯郎老氣雄萬夫狂歌飲燕市擊筑聲嗚嗚倚天長劍插少室頗

欲四海皆東湖鷹揚虎視今焉如河山永隔黃公壚街
杯直待秋井塌青苔白骨憐君愚少年覓計生白鬚捫
參歷井無危途榮不滿腹良區區就令一朝使得八州
督爭似高吟大醉窮朝脯餘名安得潤枯骨四十豈不
知頭顱此日不足惜此酒不可無太虛為室月為燭醉
倒不用春風扶

虎害

北山虎有穴南山虎為羣目光如電聲如雷倚蕩起伏

山之根百人一飽不留骨敗衣墜絮徒紛紛空谷絕樵
聲長路無行塵呀呀垂涎口眈眈闕城闔天地豈不仁
社公豈不神哀哀泰山婦叫斷秋空雲可憐封使君生
不治民死食民世上無復裴將軍北平太守今何人

寄趙宜之

趙時在
廬氏

大城滿豺虎小城空雀鼠可憐河朔州人掘草根官煮
弩北人南來向何處共說莘川今樂土莘川三月春事
忙布穀勸耕鳩喚雨舊聞抱犢山摩雲出蒼稜長林絕

壑人迹所不到可以避世如武陵煮橡當果穀煎米甘
飴錫此物足以度荒歲况有麋鹿可射魚可罾自我來
嵩前早乾歲相仍耕田食不足又復違親朋三年西去
心籠禽念飛騰一瓶一鉢百無累恨我不如雲水僧崧
山來幾層不畏登不得但畏不得登洛陽一夕秋風起

羨殺雲間

一作吳中

張季鷹

紀子正杏園燕集

甲午歲

紀翁種杏城西垠千株萬株紅豔新今年寒食好天色

曉氣鬱鬱含芳津天公自愛此花好朝薰暮染煩花神
融霞暈雪一傾倒非烟非霧非卿雲未開何所似乳兒
粉妝深絳脣能唬能笑癡復騷畫出百子元非真半開
何所似里中處女東家鄰陽和入骨春思動欲語不語
時輕顰就中爛漫尤更好五家合隊號與秦曲江江頭
看車馬十里羅綺爭紅塵陽平一邑多詩豪主人買酒
邀衆賓花時有成約恨少楊子張吾軍落花著衣紅續
紛四坐慘澹傷精魂花開花落十日耳對花不飲花應

嗔愛花常苦得花晚爭教行樂無閒身芳苞一破不更
合且看錦樹烘殘春

王黃華墨竹

為郭輔之賦

古來墨竹尊右丞東坡斂袂不敢評開元石本出摹寫
燕市駿骨留空名亦有文湖州畫意不畫形一為坡所
賞四海知有貧富亭深夜幅巾老明經老死不敢言縱
橫豈知遼江一派最後出運斤成風刃發斲雪溪仙人
詩骨清畫筆尚餘詩典刑月中看竹寫秋影清鏡平明

白髮生娟娟畧似萱草詠落落不減叢臺行千枝萬葉
何許來但見醉帖字歌傾君不見忠恕大篆草書法趙
生怒虎喫墨成至人技進不名技遊戲亦復通真靈百
年文章公主盟屏山見之蹠且擎聲光舊塞天壤破議
論今著兒曹輕有物於此鳴不平悲邪嘯邪誰汝令只
恐破窗風雨夜怒隨雷電上青冥

泛舟大明湖

侍杜子不至

長白山前繡江水展放荷花三十里看山水底山更佳

一堆蒼烟收不起山從陽丘西來青一灣天公擲下半
玉環大明湖上一杯酒昨日繡江眉曉間晚涼一擢東
城渡水暗荷深若無路江妃不惜水芝香狼籍秋風與
秋露蘭襟鬱鬱散芳澤羅襪盈盈見微步晚晴一賦畫
不成枉著風標誇白鷺我時驂鸞追散仙但見金支翠
蕤相後先眼花耳熱不稱意高唱吳歌叩兩舷喚取樊
川搖醉筆風流聊與付他年

九月七日夢中作詩續以末後二句

桃花紅深李花白昨日成團今日拆歌聲滿耳何處來
楊柳青旗洛陽陌撫君背握君手朝鐘暮鼓無了期世
事於人竟何有青青鏡中髮忽忽成白首六國印何如
負郭二頃田千載名不及即時一杯酒

湧金亭示同遊諸君

太行元氣老不死上與左界分山河有如巨鼇昂頭西
入海突兀已過餘坡陀我從汾晉來山之面目腹背皆
經過濟源盤谷非不佳烟景獨覺蘇門多湧金亭下百

泉水海眼萬古留山阿
感沸灤水源滄淪晉溪波
雲雷涵鬼物窟宅深蛟鼉
水妃簸弄明月幾地藏發
泄天不訶平湖油油碧於
酒雲錦十里翻風荷我來
適與風雨會世界三日漫
兜羅山行不得山北望空
長哦今朝一埽衆峯出千
鬟萬髻高峨峨空青斷石
壁微茫散烟蘿山陽十月
未搖落翠蕤雲旂相盪摩
雲烟故為出濃淡魚鳥似
欲留婆娑石間仙人迹石
爛迹不磨仙人去不返六
龍忽蹉跎江山如此不一
醉撫掌笑殺孫公和長

安城頭烏尾訛并州少年夜枕戈舉杯為問謝安石蒼
生今亦如卿何元子樂矣君其歌

南冠行

癸巳秋為
曹得一作

南冠纍纍渡河關畢逋頭白乃得還荒城雨多秋氣重
頽垣敗屋深茅管漫漫長夜浩歌起清涕曉枕留餘潸
曹侯少年出紉綺高門大屋垂楊裏諸房三十侍中郎
獨守殘編北窗底王孫上客生光輝竹花不實鵲雛饑
絲桐切切解人語海雲喚得青鸞飛梁園三月花如霧

臨錦芳華朝復暮阿京風調阿欽才暈碧裁紅須小杜
長安張敞號眉嫵吳中周郎知曲悞香生春動一詩成
瑞露靈芝滿窗戶魚龍吹浪三山沒萬里西風入華髮
無人重典鷓鴣裘展轉空牀卧秋月寶鏡埋寒灰鬱鬱
萬古不可開龍劍出地底青天白日驅雲雷層冰千里
不可留離魂楚些招歸來生不願朝入省暮入臺願與
竹林嵇阮同舉杯郎食猩猩脣妾食鯉魚尾不如孟光
案頭一盃水黃河之水天上流何物可煮人間愁撐霆

裂月不稱意更與倒翻鸚鵡洲安得酒船三萬斛與君
轟醉太湖秋

題劉紫微堯民野醉圖

蒼苔濁酒同歌呼白鬚紅頰醉相扶堯時皇質未全散
不論朝野皆歡虞望雲雲非雲就日日非日先秦迂儒
強解事極口譽堯初未識堯民與酒同一天此外更誰
為帝力仙老曾經甲子年戲將陳迹畫中傳山川淳朴
忽當眼迴望康衢一慨然

一本無此二句

不見只今汾水上田

翁鞭背出租錢

堯甲子年仙
人張果事

下黃榆嶺

北崖玄武暮默黑如積鐵東厓劫火餘絢爛開錦纈就
中嶺頭一峯凸樸竒剝費寒雲幾千疊摩圍可望不可
到青壁無梯猿叫絕林烟日射彩翠新跬步疑有黃金
闕畫工胸次墨汁滿那得水壺貯秋月直須潮陽老筆
迴萬牛露頂張顛揮醉帖石門細路無暗泉行人饑渴
挽不前辛苦黃榆三十里豈知却有看山緣

驅豬行

黃臺張氏莊作

沿山蒔苗多費力辦與豪豬作糧食草菴架空尋丈高
擊版搖鈴鬧終夕孤犬無猛噬長箭不暗射田夫睡中
時叫號不似驅豬似稱屈放教田鼠大於兔任使飛蝗
半天黑害田爭合到渠邊可是山中無橡栗長牙短喙
食不休過處一抹無禾頭天明隴畝見狼籍婦子相看
空淚流旱乾水溢年年厄會計收成纔什一資身百倍
粟豆中儋石都能幾錢直兒童食糜須愛惜此物羣豬

口中得縣吏即來銷稅籍

遊龍山

曩予尉大梁得交此州雷與劉自聞兩公誇南山每恨
南海北海風馬牛老龍面目今日始一見更信造物工
雕鏤是時山雨晴平田綠油油並山涼氣多况得通深
幽山泉谷口出迎客石罅戛擊琳瑯球蜿蜒入微行漸
覺藤蘿罥衣樹打頭惡木拉飈棲直幹比指稠石門無
風白日靜自是林響寒飈飈一峯忽當眼仰看看不休

一峯一峯千百峯雖欲一一顧揖知無由金城偃蹇不
得上瑤壘回合如相留苔花萬錦石丹碧爛不收天關
守虎豹武庫開戈矛小山隨起隨偃仆獨立千仞絕頂
縹緲之飛樓百花岡頭籍草坐瀟灑正直金蓮秋亭亭
妙高臺玉斧何年修登高覽元化快如鷹脫鞴山靈故
為作開闢巧與詩境供冥搜白雲何許來纖絲弄輕柔
蓬萊作霧湧飄飄與烟浮玉衣仙人鞭素虬翕忽變化
令人愁須臾視六合浩蕩不可求初疑陶輪比運甓今

悟夜壑真藏舟劫石拂未窮杞國浪自憂斷麓立極萬
萬古爭遣起滅如浮漚快哉萬里風一掃天四周誰言
太始再開闢日馭本自無停轡舉手謝山靈就無清涼
毫相非神羞賤子貪名山客刺已屢投黃華挂鏡臺天
壇避秦溝泰山神明觀二室汗漫遊胸中隱然復有此
大物便可揮斥八極隘九州玉峯有佳招絕唱須一酬
為君探囊擲下珊瑚鉤白雲相望空悠悠異時華表見

老鶴姓字莫忘元丹丘

遣山游神川與李冶張德
輝結吟社稱龍山三老

遊泰山

泰山天壤間屹如鬱蕭臺厥初造化手辨此何雄哉天
門一何高天險若可階積蘇與累塊分明見九垓扶搖
九萬里未可誣齊諧秦皇憺威靈茂陵亦雄材翠華行
不歸石壇滿蒼苔古今一俯仰感極令人哀是時春夏
交紅綠無邊涯竒探忘去聲登頓意愜自遲回惜無賞心
人歡然盡餘杯夜宿玉女祠崩奔湧雲雷山靈見光怪
似喜詩人來雞鳴登日觀四望無氛霾六龍出扶桑翻

動青霞堆平生華嵩遊茲山未忘懷十年望齊魯登臨
負吟鞵孤雲拂層崖青壁落落雲間開眼前有句道不
得但覺胸次高崔嵬徂徠山頭喚李白吾欲從此觀蓬
萊

遊承天懸泉

詩人愛山愛徹骨十月東來犯冰雪懸流百里行不前
但覺飛湍醒毛髮閒閒老仙仙去久石壁姓名苔蘚滑
此翁可是六一翁四十三年如電抹并州之山水所狀

駭浪幾轟山石裂只知晉陽城西天下稀娘子關頭更
奇崛周南留滯何敢歎投老天教探禹穴君不見管涔
汾源大車輪平泉大八玻璃盆不知承天此水何所本
乃與沆瀣爭雄尊平地突出隨崩奔洶如頽波射天門
太初元氣未凝結更欲何處留胚暉素蚪騰擲翠蛟舞
袞袞後出皆鯁鯁雷車怒擊冰雹散石峽峻滑蒼烟屯
憑崖下視心魄動自媿氣衰筆老勝槩過眼無繇吞少
東水簾亦瀟灑珠琲一一明朝瞰陽龍暗滋瑤草活巖

石自與蓮湯溫神祠水之許儀衛盛官府頗怪祠前碑
稽考失莽鹵吾聞允格臺鮐宣汾洮障大澤自是生有
自來歸有所假而自經溝瀆便可尸祝之祀典紛紛果
何取子胥鼓浪怒未洩精衛銜薪心獨苦楚臣有問天
不酬肯以誕幻虛荒驚聾瞽宇宙有此水萬古萬萬古
人言主者介山氏且道未有介山之前復誰主山深地
古自是有神物不假靈真誰敢侮稗官小說出閭巷社
鼓邨簫走翁媪當時大厯十才子爭遣李諶饒陋語石


林六月清無暑人家青紅濕窗戶射鹿有場魚有浦好

菜糟臺俯洲渚甕面椰瓢挹膏乳醉扶紅袖別吳歌風

雨不憂驚妬女

間開公守平定以大安庚午來遊迄今壬子四十年矣土俗傳介子推被焚

其妹介山氏恥兄要君積薪自焚號曰妬女祠碑大厯中制官李諶所撰辭旨殊謬至有百日積薪一日燒之之語鄉社至今以百五日積薪而焚之謂之祭妬女云



御訂全金詩增補中州集卷六十四